

清容居士集

二

清容居士集卷第十五

開平第一集 甲寅

延祐改元五月三日分院十五日

始達開平得詩數篇錄示兒曹

居庸關

太行領羣山萬馬高下拜平巒轉城隍隱
隱南北界危坡互交牙寒溜瀉泮泮陰風
玄虬湧巨石忽崩壞周遭青松根下有古
木砮石皮散青銅云是舊戰鎧天險不足
憑歷劫有成敗驅車上林杪出日浴光忙
肅肅空巖秋天風迅行邁

雨中度南口

山寒絕禽鳥獨聞子規啼石壁飛雨驟衆
木搖淒淒瘦馬蹴亂石高下齧其蹄陟嶽
沮洳深漸覺所歷低暝色起亭午土屋流
寒泥須臾過雷聲倏忽生晴電水清亦可
渡戒僕踰前溪

重午日宿南口小店

寒雨鳴石峽蕭蕭五月秋道逢采藥人不
識葵輿榴氣清諧令節暑溽想南州涼颼

木未來動色思重裘猶持一卮酒慰彼湘
纍愁

桑乾嶺

漠漠清都近天梯爾許長青帘矗山影烏
帽拂雲光行客穿珠曲居人綴蜜房端窮
萬里目那惜九迴腸

渡懷來沙磧

沙清圓石瘦千里聞風聲驅此駭赫車索
索莎鷄鳴遠山列翠席近坡環碧城高下
各有險轍迹那由平驚免導我前歷錄為
之驚天低雲搖蕩土曠塵縱橫謬膺翰墨
選遠行有期程迴頭望南坂初月隨風生
草地

龍門

帶水殘沙似暗潮平坡軟草綠迢迢不須
迴首更南望下馬同兒摘地椒
瀚海雙龍鐵鱗甲捲聲擊雲躡翼闌千泉
百道湊東南急雨翻空迸晴雪古言神禹
功宸多導山鑿石疏九河幽都之地不復
顧迺使雙龍下地成盤渦陰風何颼颼磅

礧太古秋崩崖落車礧惟木森戈矛碎沙
晴日銷金赆云是昔日當關挽勁之僕姑
寒泉組練結九曲亭午赫日光模糊車聲
何麟麟昨宵急水迷無津垂堂之言猶在
耳游子商人行不已子現徹天呼我歸翠
華北幸那得避龍門之石高不磨泚筆書
我龍門歌

彈琴峽在居庸

寒泉飛玉峽誰彈使成聲下有戰士骨鳴
咽水中鳴絲石本異調摩戛生衝成鑿跡
匪神禹佳兵構秦羸駐馬為聽之逝者何
不平虛北納新雨急促濁復清重華初省
方百神靜相迎為作薰風弦散彼巖下情

雲州

天闊雲中郡剛風起沈寥甕房聯澗曲土
屋覆山樹檀布朝朝市通薪戶戶燒遙看
塵起處深羨霍嫖姚

次韻虞伯生題祝丹陽道士募九
歌圖

玉眸精佇朝玉皇五采萬物迎初陽神鈞

空洞光茫茫瑤席合奏樂未央沉幾經綸
白為章膚寸帝青下填阮朝挾朱鳥招八
方旋轉風輪盪金剛君山之峰隴可望玉
女鼓瑟哀不傷世職玄籍元運昌靈壽給
扶顏色蒼賜齡金篋難度量仲氏之道誰
為長深根抱一真有常下憫濁世生復亡
浴精昧谷暎扶桑察陽昭德森九芒亘劫
永寶天地光安流舒舒復湯湯儼思白璧
謝汝將歷險有戒毋垂堂乘軺從豹何陸
梁菰蒲拒粒粒弦管張積變不化游益荒屈
子調苦心忠良歌罷雲暎投靈湘簫巫鼓
胥紛莫詳嚴嚴祝冊遺鉛黃握管用九神
歸藏出入森衛視錦囊

伏日書懷二首

伏日急雨來端坐披重裘中天異寒暑茲
維帝王州碧草記初夏堅冰在餘溝野曠
無留禽積潦不復收飛雲屢晴陰蒼莽天
宇秋營營壁間蠅就暖旬日謀玄冥自成
歲高下各有求悵彼南飛鷹素心愧難酬
晨起萬竈烟墨雲何輪困念昔種松者用

志良苦辛寒沙草湯萬騎來無津樹之
侶雲柵積雪迷秋春大車棟復楹小車樵
與薪空餘千歲脂成此官路塵我衣素脩
絮雙汗不敢真俛焉拾餘煤作書記其目
題李士弘學士畫明復齋風竹
虛聲出素壁冷冷天地秋矧此三伏涼居
然索重裘盪摩神光旋展擊玄露浮浩蕩
白玉京頃刻瀟湘洲昂昂負嶠僊筆底寒
颼颼高齋巖道氣深根滄無求

慈雲堂 周南翁祖母

萬竹鳳岡下虛堂偉翠微隔林聽返哨前
嶺望孤飛山立斑斕服牛眠錦繡圍諸孫
有遺範致樂報春暉

南翁近築致樂堂奉母

送濯伯玉之官雲南

蕩蕩哀牢國耕桑樓不毛皮船乘驛穩銅
鼓報衙高事簡歸王化民淳汰吏曹端知
清淨理山水縱遊遨

次韻玉堂畫壁

至人悟窮達歛迹寓醒取良苗貴深扶掖
土戒蒿莠霽霽新陽浮高下接熬宙跨犢

東南行問事一俛首新雨瀉溝塍交流媚
川后輟耕非素心帝命資左右相彼前山
雲條速復還岫卷舒樂樂澗署壁寫其舊
清秋暎空谷風雨百神守夙昔經濟姿志
不在杯酒要使風俗淳斯民樂仁壽

秋谷耕雲

再次韻

寒江釣雪

粵商有阿衡肥遯樂畎畝深畊力其勤嘉
穀寧有莠時來起丘園勲業冠宇宙持此
金石心毘勉佐元首維敬在一德維訓守
先后高風邈難追白雲在前岫堂堂匡濟
功匪以夙昔舊驛彼執御人先道謹為石
精忠百王避正色九關守我昔夢見之再
拜將卮酒空谷秋思深圖之奉千壽
維昔師尚父垂老鬚眉雪空元江海姿韜
精忘歲月坐石投其竿秘籥時一發載車
與之歸在德不在軌念昔經濟人事定始

功閔寒江眇風濤乘桴可如筏

上都客舍士弘為作風竹

門巷泥深笑獨清此君蕭灑未忘情無端
昨夜風花急却送秋聲作雨聲

金主畫盃浩然騎驢圖

生前明主已遭嗔身後君王為寫真家國
總緣詩句嚴瀾陵猶勝蔡州塵

木葉山前雪似銀軟裘難作自由身想應
晚歲朝陵後故寫騎驢處士真

北關明言不上書塞驢何自入西都開元
天子元無分留與他生作畫圖

李陵臺

矢盡穹空計未疎囊封朝奏侶憐渠漢家
天子春秋責從此降臣直筆書

雪衣寒沙風衣灰眼穿猶上望鄉臺隴西
可是無迴鴈不寄平安一字來

上都楊節婦

吹徹玉參差孤鸞天外飛匣藏身後劍
寶嫁時衣壽樂厖眉聳心清鶴骨肥諸郎
新玉立孝謹報春暉

開平第二集 已未

登侯臺

蜿蜒西龍岡綠草搖晴波旁有雙玉井石
角增差我明良佐神運目力窮坡陀層垣
睥睨雄寶構通義城昂昂鐵竿聳飛鳥光
盪摩土屋粘密房文氈圍錦窠緬思皇猷
遠默止松林戈匪以清暑游跋履勞鳴珂
陰森晚色晦寒沙聚群駝悲笳月初上戴
斗瞻天河

次韻伯宗同行至上都

游塵捲飛蓬積水翻驚波羣山擁雙闌勇
勢凌岷峨藉草各小憩側身復登陀纖峰
脩眉聳佇立愁湘娥仰視北斗光燁燁疑
肩摩田父指我言昔日搜鵬窠吾皇罷畢
弋射生久投戈二客何舒遲直可鳴朝珂
銀鬚傳綠蟻翠釜登紫駝出處愧我異愛
君筆懸河

再次韻答李彥方應奉

良會難具陳歲月流頽波念昔邂逅初黑
髮雲冠我羣公擅碑板雄文記頭陀于時

接英武奉身如素娥粲粲白玉署墨沼爭
漸摩所思筆成塚不計印積窠君時皎冰
雪正色羞倒戈習隱吏金馬弔古師銅駝
瞬息已廿載愧彼桑乾河

伯宗再次韻復叙舊

玉署日倒影綺窓水迴波堂前雙琪樹暑
清綠雲裁君時坐其下涼漪起陂陀悲商
激湘纍急羽凌韓娥執簡諒且直惜日勤
編摩盛世昭休明早枝鳥爭窠掀髯紀其
瑞刻佞倖鉛戈占風念靈烏聽水悲老駝
俯仰各努力解珮投于河

伯宗遊華嚴寺次韻二首

平蕪寒磧際突兀梵宮尊白石開金地青
蓮攤紺園城低千嶂擁塔靜一鈴喧風昔
莊嚴果無言急掩軒
欲問生公法年深不上堂斷雲成密樹深
柳當疎篁十地三乘要諸天百和香玄機
吾素解何日勘禪房

上京雜詠

雲護中街日風開北戶天千溝凝白雪萬

竈起青煙午潯曾持扇朝寒却水綿松林
空有界剪伐不知年

土屋層層綠沙坡簇簇黃馬鳴知電急鴈
過識天涼墨菊清秋色金蓮細雨香內園
通閤苑千樹壓羣芳

天闌虛無裏城低納速山白榆迷鴈塞青
草袖龍灣市簇家家近官清日日聞重游
深悶俗漸恨鬢毛斑

舊歲寒冬惡霏霏土雨迷門荒聽馬草草
淨絕牛蹄列帳烟光慘空營月色低縣官
捐粟帛歲晚得扶携

上國饒為客天涼眼倍青白魚沙際網黃
鼠草間翎芍藥圍紅斗摩姑綴玉釘漸知
塵骨換振佩接青冥

天錫清涼國晴霞終雪峰月低疑墮兔雲
近得攀龍寶鑑領冰撒筠籠賜果封白頭
貂帽客為我話深冬

馳鼓村村應傳更趣進程草肥涼露白樹
薄曉風清帳殿橫金屋氈房簇錦城屬車
流水度細點侍臣名

伏日瓊林宴名王總內朝帽尖花壓翠衣
角錦團貂炙熟牛酥毛醅深馬乳澆柘枝
旋舞急宛轉稱纖腰

市狹難馳馬泥深易沒車凍蠅爭日聚新
燕掠風斜晚汲喧沙井晨炊斷木槎閭閻
通若酪俗簡未全奢

長夏崇真館踈簾洒靜便支頤推萬古止
息契重玄月窟窓如雪天瓢酒似泉主人
憐老客下榻不曾懸

再次韻

帝京環陸海平野接冰天龍吐青林火狼
沕熬塞烟風花秋黯淡雲葉雨連綿昔日
君臣意深符卜洛年

寶閣凌空涌金壺暎日黃梵音通朔漠法
曲廣伊涼御榻惟經帙宮爐獨篆香吾皇
清淨德銀管願垂芳

高下雲中樹疎明雪外山坡凹茅結屋嶺
轉水回灣禁路分馳道沙塲當內閣通明
風露冷時許侍清班

晨起儀臺立烟青望眼迷草低鷹側目車

逼馬迴蹄風勁弓弦直泥融柱礎低蚊蠅
深斂跡塵尾不須携

然極中天正森森接帝青鷹歸傳帛信雉
落舞紅翎寶所金千頃朱門帶萬釘瀛洲
清淺處高坐納空冥

昔年曾扈蹕宿直對鰲峰錦掣蘭若翠波
翻墨沼龍起居青簡注除拜紫泥封共說
先皇日千官總住冬

土驛高低置蒼茫七日程馬通分熠燿牛
酪注深清殘雪明珠闌繁星列火城前山
黃白覆草藥不知名

千蝶蜂腰凸羣山馬首朝沙塲調俊鶻草
窟射豐貂開舞花頻簇狂歌酒恣澆今年
春事減土舍雪齊腰

箭落驚遊騎鈴傳督運車土風殊楚越驛
道做褒斜細雨三更枕清秋八月槎夜聽
繁管急漸習五陵奢

長齋孤館靜捧腹睡便便酒斷眸凝碧塵
深鬢返玄凍蜂粘暖草乳燕啄冰泉過翼
時頻數鄉心日夜懸

李陵臺次韻李彥方應奉

前坡聳頽基云是望鄉臺往事已歷歷亂
石何鬼鬼想此二子別袂結不能開河梁
白日速翔風袞沙堆漠法重失律輕生表
奇才一跌不得返歎壯心摧形影胡越
分骨肉參商乖萬事已瓦解誰能寓余哀
昂昂司馬生義色興壯懷子卿固偉節屬
國何低徊褒功實誦淺議刑良刻哉坐令
衛律輩歲望邊城來

次韻李齊卿呈閑閑嗣師

清都逼數微瑤光流玉壇陰厓太古雪伏
日生午寒澄懷集遐思黑髮竹皮冠玄關
轉輕雷銀潢激層瀾取彼白石詞寄呂朱
絲彈一彈去日短再彈行路難兩曜疾飛
隼歸雲生樹端速游感夙昔努力慎風餐
西京李齊卿讀所贈吳公詩愛之
遂次其韻

溫溫紫玉姿陽休升觚壇維時夜氣肅璇
璣動芒寒辟公閱多士謂宜錫冠冠環水
會文海俾爾揚清瀾東南有高楼繁吹和

急彈我獨念子意希聲世知難遺情寄寥
廓冥鴈渺雲端去住靡所止精思勿忘餐

伏日

伏日陰陰九月天雲邊桂露十分鮮侍臣
已入清涼境不到凌虛未是僊
偷桃曷倩語言尖伏日歸來割肉廉那似
蓬萊風露冷重裘端坐絕趨炎

松林行

陰陰松林八百里昔日相傳為界址奇雲
捲甲天馬來雪兔霜狐先委靡山前犬牙
十六州石郎屈膝輕相投淺沙圓石古轍
迹草青草枯無盡愁 拂天鎮南北萬
井燃松煙侶墨太車 龍角全小車輪
困束矛戟松花落子 復抽不如昔日當
道稠採薪之人不辭 出郭十里爭相酬
君不聞雪山之西銅柱南溟同鴨綠成東
漸金山橐駝爭貢寶翦取平林作馳道

採摩姑

官山摩姑天下無迸石齒蠶攢寶珠阿香
執御雲中驅天瓢急注爭葩萼玉京高門

散金鋪剝欲點綴完無膚萬釘寶帶山澤
癰圓如佛螺綴頭顱累如拒黍連二稗羶
根未許相糝糊料泉石鼎鳴笙竽急投小
烹養甘腴上池三咽生醍醐五芝高著神
農書吾欲比之議匪迂天衣代址嚴貢輸
永言定論兄弟俱

尚尊賜張上卿薛玄卿賦詩次韻

龜眸鶴骨煉純陽言合靈著行有常黼坐
近瞻堯日月屬車速度漠封疆英雲玉佩
閑僊府湛露瓊卮出尚方可恠相如多病
渴頰分金掌接恩光

再次韻

居庸曉次日初陽蕭蕭龍旂出奉常獸殿
頻趨恩有秩鵲爐深祝壽無疆冰壺酒滑
通真一雲閣香清接上方靜夜屢陪談麈
樂燈搖寒燼目搖光

復成二篇

羞逐羣芳度艷陽丰神弘景筆元常氣雄
轉旆攻秦壁色正登壇復魯疆易玩天皇
遊太古書看王會補殊方平生物論深涇

渭寶鑑懸空皆透光
孤鳳清聲出嶧陽冲天朱羽越尋常清心
侍帝真賢國東駿從師屢出疆明月乘鸞
通碧落空江瘞鶴憶朱方詩囊永次傾珠
琲一一清圓敵夜光

西京任庭瑞樂善齋

大鈞妙無心變化各有職元陽執樞紐羣
動遂生息達人洞顯幽語默絕窺測尸居
碧窓曉觀萬養真寂春葩陽林秀衆采紛
蕤蕤上有黃鸝鳴下有游鹿跡嗒然遺世
情至道在几席芝眉紫綸巾舉酒起玉色
桐孫護清風竹母引白石素心絕榮侈天
爵實有得敦龐古遺民過里車已式顙言
表其間庶以昭帝則

白雲閑齋

武當靈峰通廊寨下有白雲護山腰朝入
寢扉結翠被暮宿丹井騰金瓢神君握機
不盈寸頃刻倒影旌幢飄道人夙昔慣所
見更上岩窺挾斗杓

送金華王生

不到金華洞于今二紀餘偶逢騎鶴客為
覓牧羊書芸茆秋消蠹萱堂暮饌魚江湖
易衰感暫且問樵漁

建昌李生城南別墅

雲樹黑微茫依稀見竹房山空遼鶴化市
近海鷗藏逸興王官谷幽禪華子岡展圖
塵眼眯剽欲濯滄浪

開平第三集 辛酉

至治元年二月庚戌至京城壬子入禮闈
考進士三月甲戌朔入集賢院供職四月
甲子扈

蹕開平與東平王繼學待制陳景仁都事
同行不任鞍馬八日始達留開平一百有
五日繼學同邸八月甲寅還大都得詩凡
六十二首道塗良勞心思彫落姑錄以記
出處耳是歲八月來桐序

次韻繼學途中竹枝詞

居庸夾山僧屋多鑿石化作金彌陀但看
行車度流水不見舉拂談懸河
紅袍旋風漾金泥車前把酒長跪齊忽聽

琵琶相思曲迎郎北來背面啼
氈房錦幄花簇勻酥凝疊餅生玉塵晚傳
宮壺檀板急酒轉一巡先吐茵
土屋苦草成磨麻前床翁媪後小姑我郎
南來得小婦蘆笛聲聲吹鷓鴣
雲州山如五朶雲老松積鐵靈青春遂令
古雪不肯化萬杵千爐煎貢銀
山後天寒不識花家家高曠芍藥芽南客
初來未諳俗下馬入門猶索茶
寒風捲蓬沙轉黃駐馬問路路轉長紅衣
簇簇入新市指點壚頭稱上方
翔雲蕩蕩愁燭龍土房擁被睡高春披衣
上馬過前驛清霜急雪時相逢
瀛洲往歲侍宸居一度還家一度疎近行
開平十二驛眼望南鴈傳鄉書
閭闔雲低接紫宮水精涼殿起薰風侍臣
一曲無懷操能使八方歌會同

四月二十六日曉霜

遠坡殘月露零零曉壓樹花玉作屏他年
若向南州說疑是鄒生逞恠靈

戲題桦皮

褐裳新脫玉層層紅葉朱蕉謝不能擬製
小冠韜短髮意行雲水一枝藤

望雲州

望雲州裏松花白金閣山前木葉丹駐馬
搖鞭游不到還家寫作畫圖看

次韻蔣玄卿南還題驛二首

思君月落見參旗碧眼微醺倍陸離北上
開平復南去却如這棹刺溪時
碧窓雲冷思萋萋曉榻黃庭眼未迷宜向
山陰道中住聽風聽雨聽猿啼

次韻荅陳明復

漢殿高懸五丈旗羽人朝奏佩江離綠章
已徹蒲團坐正是金門月上時
碧雲深處草萋萋誰道桃源路已迷昨夜
紫霄峰頂坐天鷄子夜獨先啼

再次韻

行殿風高十二旗碧雲深處紫流離相如
獻賦誰能繼有客瀛洲獨立時
烟籠沙磧凍雲萋錦簇樹花五色迷不是

朝天騎馬倦寒雞自怯曉鐘啼

次韻李伯宗學士途中述懷

山巍磧瘦馬途遲盡日雲陰變四時曉度
桑乾雪新作倚松叅坐闌題詩

李陵臺下日遲遲惆悵河梁執別時漢武
不知歌四牡千年競作五言詩

縈紆馳道屬車遲白髮微臣際盛時侍獵
能追上林賦登臺額繼柏梁詩

紫禁天低夏日遲深紅芍藥勝春時共仰
雲孫李學士樂府新填更進詩

內宴初筵舞尉遲榴花未吐艾花時宮詞
久矣無王逮把筆爭傳應制詩

驚峰土冷菊花遲滴滴金明八月時留取
東平老學士烹羊分韻酒催詩

端午謝吳閨閨惠酒

客裏端陽景物殊侍晨分釀出偏壺松間
尚積千年雪澗底難尋九節蒲霏玉論陳
醫國艾研朱手寫辟兵符侍臣陡覺蓬萊
近簇簇宮花偏藥珠

榆林

白榆天上生北塞傳真種漢皇究邊略盛
秋此為重

神武開 帝京赤縣官曹擁井邑生聚繁
折戟出畊壟考昔所種榆禾黍日暮華繁
絳雜伎部一一承天寵盛衰諒有時前山
碧雲涌

龍虎臺

羣山朝宸居層臺納靈秀百泉暗東西千
嶂明左右

沙磧水
多伏流

先皇雄略深省方歲巡狩翠華聽中天問
俗首耕耨沉沉難繇臺濯濯鷹犬藪前行
節駝鼓執御各在手侍臣仰天成長跪四
方奏往聞父老言羅拜上萬壽山桃與黍
酒啓齒時一嗅乘雲去無蹤過者必稽首
登坡望儲胥氤氣微牛斗

居庸關

扈蹕朝上京嚴裘戒脩途首夏天宇肅寒
雲慘不舒足弱跨鞍窘喋喋詢前途縈紆
入南口松籟吹笙竿在昔恃險隘當關守
千夫一朝天馬來巖岬成康衢大統叶天

運神武開皇謨信矣經啓功聿起神禹圖

桑乾嶺

茲山西北來旋轉十二雷昔人望鄉處生
別何崔嵬我來坐絕頂雲漢森昭回出日
騰金鉦積露流銀臺長空不受暑雪華散
皚皚輿車引繩過屈曲勝九迴微踪愧三
至南望心低徊長風馬耳迅何當賦歸來

李老谷

層巒積明秀深壑采恩園千松受新雨一
一流珠幾少憩倚厓下清湍激林霏睡醒
日亭午隔溪啼犊歸昔有山水癖毘勉登
玉巖欣此澗谷幽亭亭白雲飛素心儻自
踰出處諒無違

龍門

蒼厓出雙闢羣山頰首尊陰風起晴雷摩
盪晝日昏鉞峽擁偏仄百川為之奔疑下
有龍漱逞恣躡天門淦兮出膚寸頃刻黃
流渾側徑出石壁巨浸存遺痕緬昔設天
險事久難窮論征衣艱艱雨神君儼雲根

獨石

亂石各參布茲山以獨稱磅礴太素初星
隕遺其形磊落絕衆附昂昂耿晶熒此土
積陰泣草木無光精疑有華表人宴坐陳
廢輿前車何繩繩去馬何騰騰問之了不
應油然白雲升

曉發

蓐食慎王事曉呈當前戶跨馬官道行細
草泣寒露亂石鳴琮琤啼鳥守荒樹行行
未十里問堆坐當路年衰壯力拘望遠彌
窘步天風捲飛蓬白日互吞吐深知非世
才歸畔擔先墓

合門嶺

寒沙高岡聚積溜開土門地媼神功奇茲
馬奉帝尊先皇歲巡幸屬車爛華軒令嚴
植前茅高下相攀援魚貫別後殿蟻行定
前屯飛丸落千尺瞥裂驚危棘履險深自
持人情戒居安寒雲蔽出日去去踰前村

赤城

茲山浴曉日牆壁流丹砂昔聞天台峰云
受珠宮霞地氣有南北變化無殊差埴墳

登禹書賴壤勞民嗟感彼山上松黑錢留
槎牙形色有正性染八徒增夸至今溫泉
下金鼎烹靈芽

灤河

近山馬昂鬣遠山鳳騰羽百谷奔亂流屈
曲長地赴維時雨新過急溜槽床注居人
匯為井千屨集沙步寒光澄玉膏甘列過
牛乳茲泉成白溝巨浸合沮洳蓮芡充饌
糧魚蝦足租賦塞翁詰疇昔陋彼成險固
往事不復論云云日東去

次韻虞伯生墨竹畫壁

墨雲參差平地湧碧窓浙瀝寒風生截為
崕峒白玉管蟄龍夜嘯幽風鳴六月雪花
飄上京崢嶸直與星斗平出門忽作江海
興推枕先聞金石聲

楊花曲

上都楊柳瘦且堅葉葉不展圓如錢年年
飛花作端午遠客乍見心茫然上都飄雪
不知數此花與雪相旋舞黃鸝聲絕孤鷹
鳴萬騎千車互來去手攀短條心欲絕宛

轉成愁恨初結寒風飛蓬捲車輪點點相
亞隨明滅南隣蕩子衣夜單曉望出日如
黃綿辛勤掇拾不敢棄顙刮龜毛同作甕
伯宗學士悲和鄧作唐律叙謝
我冠疎髮老詞臣筆底花飛點點春千里
關山勞夢寐百年泉石換精神蕪城賦罷
生新恨變府詩成嘆絕塵更有御園紅芍
藥生香一曲拓枝新

四月廿一日與繼學同出健德門
而伯庸以是日入都城作詩寄之
二子出北門一客南門來燕鴻兩相避矯
首氣崔嵬客有百和香我有蒲萄杯把杯
客不見我心為之灰願留百和香以待二
子回

乞酒潘景梁學士
長夏蕭齋學畫眠龍峰深處酒如泉山瓢
從此通來往準擬官袍不上船

次韻繼學

急電散晴雪仲夏天氣清閉戶北窓坐稍
稍新月生客至設碁局言忘遺世情盡日

無王事白雲與簷平

重午聯句

夏峰表奇雲天京候端陽寒嚴宮羅輕瑞
登水鏡光烏輪麗北陸龍舟競南湘蠅帟
逞王國蜥蜴嚴帝房事訛汙習陋風烈爐
壤剛擁貂繫絲絲飛鞭賭瓊漿帶重公莫
舞簪飄艾如張鴈分列瑤席魚貫登紫廊
白乳謝角黍青蒲截鵝肪重離天門正習
坎地軸方靈符瑩丹砂羽箭穿白楊懸闌
葵日傾懷家麥秋涼羹鼎傳太官懸席步
天罡鵲噪百壬欽蠡動九子昌截萍翠屏
偃浩漾白海長扇藏婕妤泣標儻飛廉忙
紅苞當階藥碧縷雕盤香宮花金抹額廐
仗玉鏤錫鈴催寶貼進拍奏霓裳揚舉鼎
凝脂膏戴車寶銀饒蒲萄漱澆馮琵琶宛
轉傷蟾蜍未乖驢驢裘難藏伏日奩果
貢薰風鑑冰洋瀛洲畏獨往玉署思同翔

裘馬曲

絲絲絡頭百寶裘猩血入纓火齊光錫鈴
交驅八風轉東西夾翼雙龍岡伏日翠裘

不知重珠帽齊肩顫金鳳絳闌恣曉旭日
初逐雷迴颺斗光動寶刀羽箭鳴玲瓏
翅却立朝重瞳沆沆樓殿雲五色法曲初
奏歌薰風酺官庭前列千斛萬甕蒲萄凝
熬玉駝峯熊掌翠釜珍碧實冰盤行陸續
須臾玉卮黃帕覆寶訓傳宣爭頌首黑河
夜渡辛苦多畫戟雕闥撓黠舊龍媒嘶風
日將暮宛轉琵琶前起舞鳴鞭靜驛宮門
閉長跪齊聲呼萬歲

嘉禾圖

土膏滌陽春連畛垂黃雲仁聲九域被地
瑞昭人文穰穰大同郡嘉穗表奇芳擢莖
秀雙岐駢首搭不分稭聯珠琲光苞簇綬
受紋老農善視之神化非耕耘維皇調玉
燭歲功合氤氲帝力畎畝深聲壤歌放勛
圖成上金匱寶軸森香芸侍臣丹筆工秉
心述前聞願旅天子命補亡追典墳

蘇武牧羊抱雛圖

寒甕蠲盡節旄稀野曠風低短草肥忽見
嬋娟新月上却疑身似夢中歸

李仲賓墨竹圖

筆底玄雲冰雪姿瀛洲玉佩映參差如何
昔日閭中今晚歲羞稱老畫師

開元恩長老以詩送北禪講師游

上京末章見及見余于灤陽次韻
乘槎親見玉繩流底用蒲萄與海榴塞
接天星戴斗白雲垂地水浮漚蠅頭可但
窮三藏塵尾懸知又九州問訊開元老禪
伯詩瓢今向太湖浮

王澹游墨竹

陰陰密葉鐵鉤鎖淡淡疎柯水玉簪客向
流離渾老盡臨風題筆望江南

次韻繼學竹枝宛轉詞

長年久客學吳儂應對嫦娥認妾容聞道
秋來三十日雪花飄處似深冬
聞郎腰瘦寄當歸望盡天邊破鏡飛昨夜
燈花圓似粟倚門不肯送郎衣
宮羅疊雪撚金龍郎去香奩手自封還家
貂裘綿百結教妾今年兩度縫
年年河鼓度天津郎在灤陽見得真今夕

定知郎到日桂華浮魄滿香輪

約八月十五
日抵京

陳景仁都事以詩惠酒次韻

閉門擁膝絕知聞壞壁行蝸古篆文誰遣

白衣傳剝啄新詩如雪酒如雲

短髮藤冠似晉賢瀛洲獨坐思如泉明知

白眼輕餘子客至題詩視屋椽

贈翰林何生

殘月疎星送曉鐘伊吾聲徹炯雙瞳盛年

事業須黃卷盡日交游謝碧筍案上蟾蜍

承夜露門前叱機立秋風君家居士多陰

德佇看雞翹列殿中

嗣天師墨戲四絕

橫塘野色深偉身對秋水守獨匪自夸感

彼蜻蛉子

枯蓮秋鶯

守雌氣之母見一道之宗配合貴有得丹

光結芙蓉

枯蓮鶯鶯

二禽詎無知秋聲起天外蘆枝為我旌蓮

葉為我蓋

蘆荷水禽

萬籟日惻惻水花澹無蹤孤鴻招不來泛

泛以自容

蘆荷孤鳬

果老圖

御氣如嬰兒變化能成形再過趙州橋滅
跡絕恠靈

清容居士集卷第十五



清容居士集卷第十六

開平第四集 壬戌

至治二年三月甲戌改除翰林直學士四月乙丑出健德門買小車卧行八日至開平舍于崇真宮有 旨道士免扈從宮中聞無人聲

車駕五月中旬始至書詔簡絕僅為祝父十三道已入悲愉感發一寓於詩而同院亦寡倡和率意為題得一百篇閏五月上幸五臺山以實錄未畢趣史院官屬咸還京是月丁巳發癸亥還寓舍五月灤陽大寒閏月道中大暑觀是詩者亦足知夫馳驅之為勞隱逸之為可慕也六月丁卯朔桐叙

端午日繇車中抵開平客中三度

端陽愴然有懷

居庸昔日逢端午子規聲聲勸歸去舊歲灤陽萬壽宮九節菖蒲泛瓊醕今年車中飽掀掀盲風北來雨如注沙坡馬鬣高下迎土屋魚鱗先後附舊家松篁百尋碧落

葡萄前石榴樹停車悅首不得語鄰牆簫聲雜駝鼓勞生得意同蝸牛奮臂却行等蠅席

崇真宮聞無一人經宗師丹房惟蒲苗楊柳感舊有作

雙斛青蒲苗中庭綠楊枝門鎖碧窓窈窕徘徊心不怡辛勤四十載逢辰構崇基寒日淡無華朔風助之悲想此鸞鶴侶長嘯悟成虧往昔玉局翁言罷白雲隨懷賢感夙昔悼念成涕洟夜夢忽邂逅掀髯歌薺芝

閒閒真人未至

崇真觀裏獨徘徊門鎖蛛絲燕子猜玄度來遲愁欲絕為憑白鶴寄書催

舊歲端陽與王吏部同客灤陽因成七言奉寄

舊年同飲端陽酒擊鉢聯詩日未斜我戴夫須重出塞君飄蹀躞獨留家雪花帶雨催前馬草色連空迤後車萬里功名頭竟白張騫何事苦乘槎

寓舍玄卿舊住今歸龍虎山書壁